

Mengimbau legasi Tun Razak menerusi penulisan

Oleh SAPORA SIPON

KEHEBATAN tokoh-tokoh ternama negara wajar diterjemahkan ke dalam bentuk penulisan sebagai bahan penting rujukan di samping sebagai tanda penghargaan atas jasa-jasa mereka. Allahyarham Tun Abdul Razak adalah Perdana Menteri Malaysia yang kedua dan telah mencurahkan khidmat bakti yang begitu besar kepada negara sehingga membolehkan negara menikmati keamanan dan kejayaan sekarang.

Sebagai mengenai jasa Allahyarham, pelbagai jenis bentuk penerbitan dihasilkan dalam usaha mendokumentasikan segala usaha berjasa beliau di samping memperkayakan khazanah penerbitan negara.

Ucapan-ucapan Allahyarham yang dibukukan banyak diterbitkan oleh Arkib Negara. Himpunan yang bermula dari tahun 1961 sehinggalah 1975 amat berguna untuk para pembaca memahami perjuangan beliau semasa menjadi Timbalan Perdana Menteri, Menteri Pembangunan Luar Bandar dan Menteri Pertahanan. Pembaca juga dapat menyelami kisah-kisah Allahyarham yang menyentuh mengenai pembangunan luar bandar, Rancangan Lima Tahun bermula 1961-1965, pertahanan negara, pelajaran dan kemajuan negara, penubuhan Malaysia dan kerjasama antara negara-negara di Asia Tenggara.

Selain itu, ucapan-ucapan Perdana Menteri kedua itu yang dibukukan oleh Arkib Negara juga menyentuh mengenai pelancaran fasa kedua Rancangan Lima Tahun Pembangunan Negara, isu konfrontasi antara Malaysia dengan Indonesia, keselamatan negara, pembentangan belanjawan negara di Dewan Rakyat serta ucapan-ucapan beliau di majlis-majlis rasmi.

Pembukuan ucapan-ucapan Allahyarham juga mengambil kira tempoh beliau menjadi Perdana Menteri kedua yang mana sebahagian besar daripadanya adalah berkenaan dengan ekonomi negara, perpaduan rakyat, keadaan politik dalam dan luar negara, ancaman komunis serta dasar luar Malaysia.

Ucapan-ucapan beliau sebelum kembali ke rahmatullah banyak menyentuh mengenai matlamat Dasar Ekonomi Baru, kuat kuasa Akta Keselamatan Dalam Negeri dan bagaimana memajukan ekonomi desa.

Perjuangan

Antara buku yang mengisahkan mengenai perjuangan Allahyarham ialah *Tun Razak: Putera Titiwangsa*, *Tun Razak: Profile of a Portrait*. *Tun Razak: Jejak Bertapak Seorang Patriot*.

Buku *Tun Abdul Razak: Potret Dalam Kenangan* pula ialah buku yang diterjemahkan oleh Datin Shajaratuddur Abdul Halim daripada buku asal dalam bahasa Inggeris *Tun Abdul Razak: A Personal Potrait*.

Buku berbahasa Inggeris itu telah dilancarkan oleh Perdana Menteri, Datuk Seri Abdullah Ahmad Badawi pada 30 Mac 2005. Ia mengandungi himpunan 27 esei berbentuk memoir hasil nukilan anggota keluarganya, rakan-rakan serta teman sekerja yang mengimbau kembali kisah silam mereka bersama beliau.

Di antara ucapan Tun Razak yang dibukukan ialah;

● Ucapan Tun Haji Abdul Razak 1961.

Penerbitan ini mengandungi ucapan-ucapan Allahyarham semasa menjadi Timbalan Perdana Menteri, Menteri Pembangunan Luar Bandar, Menteri Pertahanan dan Persatuan St. John Ambulance. Ucapan juga menyentuh mengenai pembangunan luar bandar, dan Rancangan Lima Tahun bermula 1961-1965.

● Ucapan Tun Haji Abdul Razak 1963.

Ia antara lain memberi penekanan mengenai penubuhan Malaysia, kerjasama antara negara-negara di Asia Tenggara juga pelancaran fasa kedua Rancangan Lima Tahun Pembangunan Negara yang memberi fokus kepada pembinaan infrastruktur di kawasan luar bandar.

● Ucapan Tun Haji Abdul Razak 1971-1974.

Penerbitan ucapan siri ini mengandungi ucapan-ucapan Allahyarham sebagai Perdana Menteri kedua setelah beliau mengambil alih tampuk pimpinan daripada Tunku Abdul Rahman Putra pada September 1970. Sebahagian besar daripada ucapan beliau adalah berkenaan dengan ekonomi negara, perpaduan rakyat, keadaan politik dalam dan luar negara, ancaman komunis serta dasar luar Malaysia.

● Ucapan Tun Haji Abdul Razak 1975 (Jilid I & II).

Ia merupakan penerbitan terakhir bagi siri ucapan beliau sebagai Perdana Menteri sebelum kembali ke rahmatullah pada 14 Januari 1976. Tumpuan diberikan kepada matlamat Dasar Ekonomi Baru, kuat kuasa Akta Keselamatan Dalam Negeri dan memajukan ekonomi desa.

Antara buku-buku lain mengenai wira negara ini ialah *A Man of Malaysia*, *Wanita Seiring Jalan: Pandangan Tun Haji Abdul Razak terhadap wanita Malaysia*, *Bapa Pembangunan: Tun Razak*.

□ **PENULIS** ialah Pengarah Perhubungan Korporat Universiti Sains Islam Malaysia.